

Fabricante di tram Sam Schwartz hopi contento cu reaccion

Delegacion di Hulanda impresiona cu e proyecto di tram y tur desaroyo rond di dje



ORANJESTAD (AAN): Den fin di siman Aruba a ricibi bishita di un delegacion grandi di miembronan di Tweede Kamer cu a participa den e encuentro entre Parlamentonan di Reino, IPKO, na Corsou. Na final a realisa un bishita na tur e islanan Hulandes den Caribe pa wak tur e desaroyonan andando. E reaccionnan pa Aruba tabata hopi positivo.

Na Aruba a percura pa un tour den caya grandi pa ilustra con proyectonan cu a worde poni riba papel, a keda ehecuta y presente tabata tur esnan cu tabatin di haber cu esaki. Un di nan ta Sam Schwartz, kende a haya chens pa combersa cu e Parlamentarionan y den un declaracion duna el a expresa su alegria pa e hecho cu e reaccionnan cu el a scucha despues di su presentacion tabata masha positivo, no solamente pa loke ta e proyecto di tram pero en general. "E delegacion tabata hopi impresiona cu e isla di Aruba. Un par di nan a comenta cu mi, cu nan a bishita seis isla y Aruba ta esun mas dinamico y cu tin un Prome Minister hopi dinamico. E ta un tremendo elogio," Schwartz a splica.

E comentarionan riba e proyecto di tram di parti di Parlamentarionan Hulandes ta cu nan a keda impresiona con e vehiculonan aki a worde construi cu e caracteristicanan di e isla

y e region aki. "Nan tabata impresiona cu e forma excelente den cual e trolleyman a worde construi, bunita y con nan ta refleha caracteristicanan di e isla."

Mayoria di e pregunta cu e Parlamentarionan tabatin ta relaciona cu e meta di e trolleyman y con a yega na e idea pa incorpora esaki den e plan pa renoba y revitalisa centro di ciudad, despues cu nan a tende hopi di esaki caba pa medio di Prome Minister Mike Eman. Schwartz a splica nan tur cu esaki tabata un vision di Prome Minister Mike Eman y esun encarga cu Infraestructura, Benny Sevinger y cu inicialmente e mes tabata un poco sceptico di e plan. E motibo tabata cu el a pensa cu mester construi stationnan di coriente y kabelnan cu ta core den laira pa e trolleyman. Sinembargo den deliberacion y consulta, a bin topa cu un sistema cu ta funcionando bon na Los Angeles cu no mester di un station di coriente apart pa e trolleyman y e resultado ta muestra tur cos. "Mi ta feliz di mira y tende reaccionnan di bishitantenan, principalmente di Merca, ora cu nan ta coriendo den e trolleyman."

Manera ta conoci, Aruba ya caba a gana un premio pa su trolleyman for di "American Council of Engineering Companies", cual lo worde entrega na maart awor na Waldorf Astoria, New York.

